

Ufficio Stampa della Provincia autonoma di Trento
Piazza Dante 15, 38122 Trento
Tel. 0461 494614 - Fax 0461 494615
uff.stampa@provincia.tn.it

COMUNICATO n. 2550 del 24/08/2022

Traduzione in ladino

Forum European de Alpbach: te la dì de inaudazion l Euregio l é stat protagonist

Da diesc egn n ca l Euregio Tirol — Sudtiroi – Trentin l endreza la “Dì del Tirol” tel program del Forum European Alpbach, che vel esser n pont de referiment e vedrina per chel che vèrda la enrescida internazionèla. Domenia l é stat ence la inaudazion del Forum e, do la messa, la defilèda tradizionèla co la musega de comun e l salut coi schiopes di Schützen de Alpbach, via per la bonora l program l à pervedù, lo dal zenter di congress de la zitadina austriaca, i saluc da man de la istituzions e i entervenc en cont del argument “Sanità e Regionalità: sciences de la vita tel Euregio”. À tout pèrt al event l president del Euregio, che l é ence chel de la Provinzia autonoma de Trent, la vizepresidenta de la Provinzia autonoma de Busan e l capitan del Tirol Günther Platter, che i à sottrissà coche la sanità sibie n argument strategich per n Euregio sostenibol.

L president del Euregio l à metù al luster che, do doi egn de gran emergenza, l é semper più de emportanza se confrontèr en cont de cheche pel se meter dant la colaborazion sorafora i confins tel setor de la Sanità. La pandemia l à metù al luster coche sie stat fundamentèl colaborèr anter teritories, per chesta rejon l EuregioLab 2022 l à out sia atenzion ai bec e ai tosec – chi che à padì maormenter a cajon de la pandemia – costion de gran significat. L argument de la sanità l é stat portà dant ence te la ultima doi radunanzes de la Jonta del Euregio: l president del GECT l creit che sie fundamentèl meter en esser n sistem sanità che mete adum la ezelenzes di trei teritories, dal pont de veduda strutturèl, tecnologich e de endrez, a na vida da miorèr i ejic, ma ence per renforzèr e smaorèr la competenzes e i servijes. Per chesta rejon l EuregioLab pel esser conscidrà n pont a favor per meter a jir n lurier coordinà e dessema te più raions con duc i atores touc ite.

Chesta scontrèda donca la vel esser l prum vèrech envers na colaborazion strenta, na radunanza, timpruma, per meter ju i aspec da vardèr fora a fon e la modalitèdes de lurier da meter a jir ti meisc che vegn. Tel detai, i argomenc porté dant te chesta pruma fasa i é stac: la sanità mentala di bec e di tosec, l raport anter sanità e nutrizion, la prevenzion sanitàra.

A Alpbach l era ence l segretèr generèl del Euregio Marilena Defrancesco e vèlch raprejentant del ofize Inovazion e enrescida del Dipartiment Sanità de la Provinzia autonoma de Trent e de la FBK.

Per chel che vèrda l Trentin l é amò da recordèr i finanziamenc per i projec de enrescida, desche per ejemie l projet “Biologia molecolèra del Neurocovid” coordinà da l’Azienda Provinzièla per i Servijes Sanitàres del Trentin che à desche colaborador l zenter de enrescida Eurac e la Università de medejina de Dispruch. Ma ence l projet Euregio Ambient, Magnadiva e Sanità-Environment, Food and Health (EFH) coordinà da

la Fondazione Mach e a chel che à tout pèrt enscinamai nef istituzions desferetes e semper finanzia dal Euregio, che vel ge dèr de contra a la malaties croniches, desche la obesità e l sorapeis per restèr segn e intons. Duc argomenc che vegn metui ite tel chèder di focus cernui per la discusion de en domenia.

L segretèr generèl del Euregio, Marilena Defrancesco, à sottrissà che l'inaudazion del Forum de Alpbach te la Dì del Tirol, l é n apuntament de gran emportanza per l Euregio: "l é n contest te chel che muie de joegn se veit ite, e che dèsc l met de se confrontèr e de cognoscer l teritorie e la peculiaritèdes del Euregio. Aon podù l veder ence ti dis passé, de gra a la Academia del Euregio, canche sessanta joegn i à descoret fora en cont del argoment del Autonomia, do 50 egn dal Secont Statut. Aon podù verificchèr, aldò de chel che i à dit, che l é stat per ic na esperienza de gran significat e ence educativa per ic. No l é n cajo che l dit che l é stat cernù fora per la presidenza trentina l é "L Euregio l é joen", l'à dit Defrancesco.

La vicepresidente e assessora a la politiches sozièles de la Provincia autonoma de Busan l'à recordà che l argoment de meter en segurezza i servijes sanitàres l é emportant ence tel Sudtirolo, soraldut, ma no demò, per via de la pandemia. I egn de pandemia i é stac coleé a restrizions spezièles, mascimamente per i bec e i joegn, estra che per la jent de età, donca l é per chesta rejon che l é de gran emportanza analisèr cheche l é sozedù e endrezèr mioramenc olache l é de besegn. Te chest chèder i trei teritories del Euregio i pel se baratèr esperienzes e durèr sinergies, integrèr i studies di colaboradores te la soluzions adatèdes al post e svilupèr coscita ensema de neva strategies.

L capitan del Tirol Platter l à sottrissà l besegn de renforzèr l Euregio desche lech de formazion e de lurier. La cooperazion tel setor de la sanità l é un di doveres più emportanc per l board del Euregio e, tel medemo temp, una de la più granes endesfides del davegnir. "la sanità l'é noscia più gran ressorsa: la pandemia la ne à fat capir chest tant. L é donca de giusta che la "Dì del Tirol" de chest an la rejone de la sanità. La costion l é che tel davegnir no rejonaron dessema demò del argoment de la pandemia, ma vegnarà conscidrà ence l conzet de sanità da duc i ponts de veduda: la mesures preventives, la cures e la post-terapias. Tel Tirol, Sudtirolo e Trentin duc i pel se emprevaler del lurèr en sinergia", l à dit.

Endrezà dal Ofize del Euregio Tirol – Sudtirolo – Trentin e dal Forum European de Alpbach, EuregioLab l é n "think thank" temporan – metù adum da esperc, politics e raprejentanc di gropes che à enteres te chisc argomenc e che fèsc pèrt di trei teritories – con chela de fèr osservazions en cont di argomenc de emportanza per i medemi teritories e i sentadins. Ti egn passé l EuregioLab se à cruzià de trasporc, ambient, enrescida e inovazion e de reforma del Statut. Aldò del argoment de la "Dì del Tirol" de chest an, i partezipanc al Euregiolab 2022, troé fora dai medemi teritories, i se à confrontà per rejonèr, e lurèr fora dessema n catalogh de idees e proponetes concretes per renforzèr la cooperazion sorafora i confins tel ciamp de la sanità. Dant che sie fora la fin del an, vegnarà portà dant e spartì con i enciariè esecutives e la aministrazions di trei raions n document de ressumèda.

Te chest apuntament l é stat dat su ence i pesc Euregio Joegn Enrescidores e Euregio Inovazion, enveze ti dis dantfora à tout pèrt al European Forum Alpbach ence l'Accademia del Euregio, olache à tout pèrt ence joegn anter i 18 e i 35 egn. Te la scontrèdes, ti confronc e ti workshop se à rejonà de Autonomia e di cincant'egn del Secont Statut.

Fotos del ofize stampa e del Euregio

Traduzion di Servijes Linguistics e Culturèl del Comun general de Fascia

(Traduzione a cura dei Servizi Linguistici e culturali del Comun general de Fascia)

(cdt)